

## Esklabu di Emoshon

Era di katibu a pasa...nos ta kere. Ma esei no ta e kaso. Awendia, e régimen islámiko na Sudan ta kapturá kristiannan i ta bende nan komo katibu pa shonnan muslim. Ma na nos islanan, ainda tin katibu di pornografía, weganan di plaka, alkohòl, nikotina, droga, èts.

Ma muchu mas hende ta katibu di algu hopi mas sutil. Nan ta esklabu di nan mes emoshonnan, katibu di sintimentu.

Esaki ta opvio por ehèmpel ku noviasko. Kurason di Buchi i Linchi ta bati duru ora nan ta topa. Nan tin sintimentu romántiko pa ku otro. Hopi hende ta aseptá nan deklarashon ku nan ta “stima” otro ku un mentalidat fatalista. Na nan konsepto, Buchi i Linchi lo mester ta destiná pa otro simplemente pasobra nan tin sintimentu romántiko pa otro. No ta importá kiko e mayornan ta bisa, no ta importá si Buchi nunca a siña traha, no ta importá ku nan ta diferensia den hopi área. E amistad lo mester ta bon, pasobra **sintimentu ta loke ta konta**. Esklabu di emoshon.

Despues ku Buchi i Linchi ta kasa, e sintimentu romántiko ta kuminsá fria. P’esei nan ta konkluí ku nan no ta stima otro mas. Buchi ta topa un beyesa ku ta pone su kurason bati duru. Maske Dios ta bisa ku matrimonio ta pa bida largu, Buchi ta rasoná, “LENNY lo mester ta esun, no Linchi!” Djis, ata Buchi ku Lenny...pasobra el a **sinti** algu pa Lenny. Esklabu di emoshon.

Pa hopi hende, satesfakashon sentimental t’e meta prinsipal di religion. Nan ke un iglesia ku músika kayente, eksperensianan ekstátiko, nan ke sinti nan bon. E bèrdat di Palabra di Dios no ta interesá nan; e dushi tempu t’e kos.

Skritura ta bis’é bon kla, “... *pordoná otro...*” i “...*stima boso enemigunan...*” (Kolosensenan 3:3; Lukas 6:27). Poko hende ta pordoná i stima manera debe ser pasobra nan ta esklabu di sintimentu.

Ora nan ta lesa tekstonan asina, nan ta ignorá nan. Nan ke sa ku Palabra di Dios ta bisa, “**Sinti** pordon” òf “**sinti** stimashon pa boso enemigunan”. Pasobra nan no ta SINTI pordon òf stimashon, nan ta dedusí ku e mandamentu ei di Dios ta impusibel. Esklabu di emoshon. **Si bo ta warda pa haña sintimentu positivo pa bo enemigu promé ku bo por pordon’é i stim’é, anto nunca lo bo pordon’é òf stim’é.**

Ma esei NO ta loke e teksto ta bisa. Lukas 6:27-31 ta mustra kla ku ora Hesus a bisa “*stima boso enemigunan*” (6:27) ku El a komuniká, “**trata boso enemigunan ku stimashon**”. Loke Hesus a bisa nèt despues ta enfatisá **trato** ku stimashon ...**nada di sintimentu**: “*hasi bon na esnan ku ta odia boso, bendishoná esnan ku ta maldishoná boso, hasi orashon pa esnan ku ta maltratá boso. Ken ku dal bo na esun banda di kara, ofres'é e otro banda tambe; i ken ku kita bo mantel for di bo, lagu'é kohe bo túnika tambe. Duna na tur hende ku pidibo, i ken ku kohe loke ta di bo, no eksigí esaki bèk. I meskos ku boso kier pa hende hasi ku boso, boso tambe hasi ku nan.*” Hesus a eksigí pa nos trata enemigunan ku stimashon, no sinti positivo pa ku nan.

**Bo por trata hende ku stimashon, asta ora bo no ta sinti stimashon pa nan!** Ma esei no ta pusibel pa hasi, si bo no tin Hesus den bo bida pa dunábo e poder pa hasié. Nunca tabata Dios Su intenshon pa bo biba riba un nivel tan haltu sin Su poder.

I komprendé tambe, no ta hipokresia pa bo aktua kontrario di bo sintimentu. Bo ta aktua kontrario di bo sintimentu kada mainta ora bo ta lamta fo’i kama. Esei no ta hipokresia! Bo ta lamta pasobra eei ta e kos korekto pa hasi. **Pa aktua ku stimashon pa ku un enemigu ta e kos korekto pa hasi, ta obedensia na Palabra di Dios**, sigur no ta hipokresia.

Dios ke pa bo ta liber di kaptividat. Sigur E no ke pa bo hiba bo bida komo esklabu di emoshon.